



## Proključalo u SBB-u Tuzla: Sumnjivi stranački izbori, pljušte optužnice zbog zapošljavanja, Centrala stranke šuti

02.08.2017 08:27



Nepravilnosti tokom unutarstranačkih izbora u tuzlanskom SBB-u, brojne optužbe za nepotizam, a na kraju i optužnica, razlog su nezadovoljstva velikog broja članova ove stranke u Tuzli. Sagovornik Faktora koji je donedavno obavljao visoku funkciju u Gradskom odboru SBB-a Tuzla, kaže da su mjesni odbori dostavili više od 150 imena kandidata za članstvo u novom Gradskom odboru, međutim, tek 11 imena stavljeno je na glasanje, a od toga je izabrano njih devet. Ostalih 140 predloženih nisu dobili pravo da budu birani, tvrdi sagovornik koji se i sam našao u toj grupi. Inače, Gradskom odbrom SBB-a u Tuzli godinama rukovodi Nedžad Hamzić, a njegov glavni saradnik i potpredsjednik je Elvir Kasumović i njih dvojica su ponovo izabrana u Gradski odbor stranke.

Iako je u Centralu stranke otišlo na desetke pritužbi, još tokom izbora u mjesnim ograncima stranke, a potom i nakon skupštine gradskog ogranka, nikakve reakcije nije bilo. - Ja kao potpredsjednik Gradskog odbora i predsjednik Mjesnog odbora Batva, najbrojnijeg u Tuzli, nisam pozvan na skupštinu, niti se moje ime našlo među kandidatima. Kako je to moguće – pita se Jasmin Habul.

Riječ je o čovjeku koji je bio direktor Izbornog štaba SBB-a na izborima 2014. godine, kada je ova stranka u Tuzli osvojila najviše glasova. - Već nakon problema u Mjesnom odboru kada je sazvana paralelna skupština, obratio sam se Damiru Arnautu, čovjeku koji je zadužen za pravna pitanja u stranci. Obratio sam se pismeno i predsjedniku Fahrudinu Radončiću, ali nakon više od mjesec nisam dobio nikakav odgovor – kaže Habul za Faktor.ba.

O optužbama nezadovoljnih članova Elvir Kasumović, općinski vijećnik SBB-a u Tuzli i novi-stari član Gradskog odbora stranke, kaže da su ispoštovane sve procedure. - Ja sam legalista i smatram da će Centrala stranke reagirati ukoliko ima nekih nepravilnosti, na bilo kakve druge optužbe ne bih da odgovaram – rekao je Kasumović.

## Nepotizam i zapošljavanje


Ipak, da nešto u tuzlanskom SBB-u ne štima pokazali su i lokalni izbori održani 2016. godine, gdje je stranka čiji čelnici tvrde da ima 4.700 članova samo u Tuzli, osvojila tek nešto više od 4.800 glasova. To je, dodajmo, duplo manje glasova nego što je stranka osvojila na općim izborima 2014. godine. Uz očiti pad podrške na izborima i upitan način provođenja unutarstranačkih izbora, ogorčenom članstvu so na ranu predstavlja optužnica za stranačko zapošljavanje i brojne informacije o nepotizmu istaknutih članova SBB-a, piše Faktor.ba.

Mahir Nurkanović, istaknuti član SBB-a, vjerovatno drži neslavan rekord u BiH jer mu je od stupanja na direktorsku funkciju u Elektrodistribuciji Tuzla u februaru 2016. godine trebalo samo 17 mjeseci da dobije potvrđenu optužnicu. Između ostalog, Tužilaštvo TK tereti Nurkanovića da je na pozicije u Elektrodistribuciji Tuzla uposlio svoje stranačke kolege, a među njima je i supruga Nedžada Hamzića, prvog čovjeka SBB-a u Tuzli. Amela Hamzić prvo je primljena na posao u Gradačcu, a vrlo brzo je prebačena u Tuzlu.

Posljednji u nizu primjera je kadar SBB-a na poziciji direktora BH Telecoma u Tuzli Sadik Džidić, koji je svoju kćerku zaposlio u Direkciju kojoj je na čelu. Podsjećamo, Elvir Kasumović nedavno je za Faktor potvrdio da je bio član Školskog odbora kada je za direktoricu Osnovne škole "Slavinovići" u Tuzli, imenovana Lejla Beširović, supruga njegovog rođaka Senaida. Optužbe za korupciju i nepotizam nisu prepreka za držanje pozicija u SBB-u, barem takvu poruku šalje šutnja iz Centrale stranke, piše Faktor.ba.

(TIP)

---

 Sviđa mi se 29K ljudi vole ovo. Registriraj se da vidite šta se sviđa vašim prijateljima.

---